

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 59 (1974)

Heft: 3

Artikel: Il scolar e siu daner da sac

Autor: Cathomen, Ignaz

DOI: <https://doi.org/10.5169/seals-881952>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Il scolar e siu daner da sac

dad Ignaz Cathomen

Gia els onns d'affonza gioga il daner ina eminenta rolla. Denter 4 e 5 onns vegn igl affon pertscharts dalla muntada da quel. Il secuntener dils carschi lai percorscher el che la muneida ei in mied cul qual ins sa contonscher enzatgei. Il regl e la stenta dils carschi suenter il daner e siu possess sveglia gia egl affon da 4–5 onns il giavisch d'era posseder tals beins. Gleiti eis el pertscharts ch'el vegn da cuntentar cun quels ses giavischs e basegns. Aschia entscheiva l'educaziun viers il daner gia en quella vegliadetgna.

Deplorablamein dat ei mo memia biars carschi e geniturs che creian da stuier remunerar scadin pign survetsch da mintga ragneret cun ina muneida. Quella vegn scochemai brattada en stizun per slugnets, zuchers, glatsch etc. Negin snega agl affon siu basegns per dultschergnems, schilunsch che quel vegn contentaus en mied e mesira. Igl ei denton caussa dils geniturs da fixar quella mesira. Lezs duessen intimar lur affons da metter lur raps gudignai ella cassetta da spargn, buca per far mantun ed educar igl affon tier in ranver, mobein per saver far diever da quels raps per acquistar zatgei raschuneivel e cunvegnent.

Cu duess ins dar daner da sac agl affon?

Dil mument che expensas persunalas vegnan en damonda pigl affon duei el retscheiver in daner da sac, pia cun l'entrada els onns da scola. En quella vegliadetgna sedistacca igl affon per in toc dalla sfera materna, ed en la cumpignia dils camerats da scola neschan spert certs basegns. Igl affon acquista ussa era en cuort temps las enconuschientschas elementaras da far quen che lubeschan ad el da spender siu daner da sac en moda raschuneivla, se capescha en mesira mudesta.

Duei igl affon obtener reguladamein ni mo occasiunalmein daner da sac (di dil num, anniversari, fiastas, per bein secuntener)? Per la secunda favur plaida: Igl affon s'endisa meins al possess pecuniar. Ins evitescha cheutras ch'il daner gioghi en sia veta ina rolla memia impurtonta. Igl educatur ha tras quella pratica in bien mied da remuneraziun enta maun.

Ils preferiders d'in daner da sac regulau perencunter fan valer il suandont: Survegn igl affon mo occasiunalmein enzatgei daners, ei quei aunc negina garanzia ch'el secuntegni indifferents viers quels, anzi il giavisch e regl da posseder els vegn carschentaus, sch'igl affon sto desister pli liung temps da scadin daner da sac. Ins astga era dubitar schebein la remuneraziun cun daners seigi in bien mied educativ.

Gia els onns da scola primara sto igl affon emprender d'ir entuorn cul daner e d'administrar quel. Quei sa esser in excellent mied educativ per disciplina, uorden e spargnusadad. Posseda igl affon mo sapocu e casualmein entgins raps, sa el buca metter quels en ina relaziun correcta cun ses basegns e survaletescha siu possess momentan. Survegn igl affon denton reguladamein pigns importos, daventa il possess pecuniar enzatgei normal e quotidian. La survaletaziun dil daner vegn cheutras plitost evitada ed il regl stravagau pil daner vegn era meins leventaus. Muort quels motivs astgan ins bein recumandar als geniturs da conceder a lur affons in daner da sac regulau, mo commensurau.

Con daner da sac duei ins dar?

Secapescha che la risposta a quella damonda dependa en emprema lingia dalla vegliadetgna digl affon; il daner da sac duei vegrir adattaus a quella. Igl ei clar ch'in scolar dalla scola manuala ni secundara ha pli gronds basegns pecuniars ch'in scolar dall'emprema classa primara. Ina influenza sil daner da sac han plinavon las relaziuns dil pli stretg conatuorn. En relaziuns da tiara ni da muntogna fan ils affons segiramein pli pintgas pretensiuns ch'els marcaus ni loghens da cura. Secapescha che la quantitat dil daner da sac dependa primarmen dalla situaziun economica dils geniturs. Denton duessen geniturs beinstants buca pupergnar lur affons cun memia bia daner da sac. Igl ei buca gest legreivel en ina classa ni scola, gie savens disgustont, sche affons da glieud beinstonta san sfarlatar lur daners mo ual aschia, ferton che auters possedan strusch in tgietschen. Tier quels leventa in tal exempl scuidonza e survaletaziun dil daner. En singuls cass sa quei menar tier enguladetschs. Igl ei era gia capitau che scolars dalla buorsa gronda han surduvrau lur conscolars dalla buorsa platta surmenond quels cun daners da cometter pli u meins gronds delicts. Savens caschuna in memia grond possess da daners tier affons garmaschia, arroganza e sprezz viers conscolars paupers e basignus.

Capeivlamein san geniturs paupers buca drizzar il daner da sac da lur affons suenter quel dils rehs. L'ulivada ston ils beinstonts far. Per quels eis ei silmeins aschi impurtont sco pils paupers d'educar lur affons tier mudestadad e cuntenteivladad. La differenza sociala en scola vegn cheutras sminuida empau. Diltut selai quella denton mai ulivar. Certas differenzas vegnan adina a restar; jeu patratgel surtut vid la vestgadira, vid uorden ed utensils da scola. Quei ei denton buc schi nausch, sche silmeins il possess da daner da sac resta empau en proporziuns ulivadas.

Il gudogn tras giuvenils

Da scolars pli vegls, da scola media, da scola secundara e manuala vegn ei savens pretendiu ch'els gudognien, silmeins per part, sezs lur daner da sac e quei entras prestaziuns da lavur nizeivla. Oz san ins savens constatar, era els marcaus, che giuvenils enqueran in gudogn duront las vacanzas (era tals che havessen tuttavia buca basegns da quel). Els s'engaschan per ex. sco cumissunaris, tier la posta, en hotels, tier suprendidors, ell'agricultura etc. En quei connex ston ins secapescha differenziar denter las relaziuns da scola dalla tiara e dil marcau. Igl ei tut en uorden, gie schizun cussegliivel, sche geniturs enqueran ina occupaziun adequata per lur affons duront las liungas vacanzas da stad (tier nus aunc adina 10–12 jamnas, ella Bassa 5–7 jamnas). La paga per ina tala occupaziun, che sa survargar ils 1500 francs (pastur d'alp), vegn duvrada pil solit pil manteniment dalla famiglia. Meglier fuss ei aunc da reservar quels gudogns dils affons per lur scolaziun futura.

Oz pli che zacu enqueran affons e giuvenils era in gudogn duront lur vacanzas pli cuortas, pil pli per augmentar lur daner da sac. Cheu ein certas resalvas segiramein giustificadas. Sch'in scolar secundar ni da scola manuala enqua in gudogn per saver acquistar cun agens mieds in velo ni velo a motor ei quei schilunsch legreivel. Ni sch'ina mattatscha vul cumprar cun ses raps gudignai ina tastga alla moda, ha negin zatgei encunter. Encuir gudogn cun ina clara finamira, per in diever nizeivel e raschunei-vel, sa esser in excellent mied d'educaziun per in affon d'ina certa vegliadetgna. Vuler recaltgar daners senza finamira sa denton esser ligiau cun certs prighels per affons e giuvenils. Savens promova quei in patr-gtar materialistic ed utilitaristic. Igl idealissem giuvenil pirescha, era la veta affonila senza quitaus e fastedis sa ir cheutras a perder. Igl ei surtut era fetg deplorabel, sche nossa giuventetgna ei promta per ina prestaziun

mo sche quella lai specular sin in gudogn pecuniar. Scadin survetsch pil concarstgaun vegn lu valetaus e mesiraus tenor pagament e gudogn.

Willi Schohaus, igl anteriur directur dil seminari scolastic a Kreuzlingen, scriva en quei connex:

«Memia biars sco era memia paucs daners da sac portan disavantatgs. Han affons da memia, meina quei savens tier ina puppergnada. Els s'endisan da posseder dapli che lur camerats ed entscheivan lu bugen a consumar dultschergnems senza mesira. Zuchers e tschugala etc. lavagan buca mo ils dents e magari il magun, mobein era il caracter sch'ei vegn surfatg cun quei vezi. Quei canticuau litgem fa ils affons puppergnai, egoistics, garegius e savens en atgna moda zaco dormulents. Il litgem munta expressivamein in act egoistic e d'amur propria. El sa daventar in ver regl e vezi che regorda en in cert senn alla onania.

Memia bia daners da sac ensiara denton era aunc auters prighels, specialmein tier affons pli gronds. Ins patratgi alla cumpra da litteratura da pauc, alla pornografia, al fumar, al diever d'alcohol, als kinos etc. Muort ina surabundanza da daners pitescha il svilup dil caracter digl affon era cheutras, ch'el vegn surmenaus tier seludem, tier far da grond e tier auters acts d'arroganza.»

Disavantatgs per la formaziun dil caracter sa ei era dar sche affons survegnan negins ni mo fetg paucs daners da sac. Ina munconza e privaziun permanenta sa caschunar in regl extraordinari da posseder daners. La consequenza ei ina gronda survaletaziun da quel. Igl affon vegn cheutras en prighel da sepatrunar da daners jasters, d'engular pintgas ni pli grondas summas. Sche la mumma ha lu aunc la disa da tener en salv ses daners mo malamein (forsa en ina scadiola en scaffa-cuschina), astga ella buc esser surstada sche siu affon entscheiva ad engular. Era ils pigns enguladetschs en scola, culs quals ils scolasts han adina puspei da s'occupar, han savens lur ragischs en la munconza ed en la survaletaziun dil possess material. La paupradad ei gie enconuscentamein la mumma dalla scuidonza.

Era pertucont ils daners s'entaupan ils extremis. Surabundanza e munconza han consequenzas fetg semegliontas. Ellas caschunan ina dependenza interna dil daner, cuort detg il materialissem, e meinan tier ina survaletaziun dil daner e dils beins terresters. Perquei duein ils geniturs ed

educators tener la via media era pertuccont ils daners da sac, conform al proverbi romontsch: «Empau perin, fa mal a negin.»

La controlla dil daner da sac

Ina controlla dil daner da sac duess ins far mo cun gronda resalva. Sco en tuts fatgs d'educaziun ston ils geniturs era en quella caussa demussar fidonza viers lur affons. Els duessen schar agir lur affons ton sco pusseivel libramein, era cun la resca ch'els fetschien inagada ina tuppidad e cumprien enzatgei ch'els deploreschan suenter. Mo tras atgna experientscha fa la giumentetgna giudezi ed empren da secuntener pli prudentamein.

En quei connex less jeu aunc ventilar cuortamein la damonda sch'ins duessi pretender dils affons ina contabilitad dallas entradas ed expensas. Ina tala ha segiramein ses avantatgs: Educaziun tier uorden e respect viers il daner, disa per ina contabilitad da pli tard, pusseivladad per in sguard retrospectiv sin expensas che paran malruschaneivlas e deplorables. Tut quels avantatgs denton pon strusch compensar ils disavantatgs. Il sforz dalla contabilitad accentuescha memia zun la muntada dil daner. El promova era ils tratgs pedants e stretgs ell'olma digl affon e quei ei tuttavia buca giavischeivel. Tgi che ha giu da far cun pedants e tugnaders sa schazegiar carstgauns generus ed inconvenziunals. Il pli grond prighel che nescha ord il sforz dalla contabilitad ei denton in auter. Tras ina contabilitad sfurzada sa igl affon curdar en da tuttas sorts malrecliadads. Tier talas vegn ei era leu nua che la controlla dils geniturs maunca. Igl affon emblida deplorablamein savens da purtar tuttas expensas en sia contabilitad. Quella vegn cheutras en disuorden. Per metter en equivalenza entradas ed expensas vegn ei lu fatg da tuttas sorts correcturas, ch'ein nuot auter ch'in engon da sesez. Entras igl ominus post «diversa» vegn la contabilitad sfurzada egl equiliber. Sch'ils geniturs controlleschan reguladamein las cudaschaziuns da lur affons vegnan quels savens en empruament da «curreger» lur expensas, vul dir, els zuppantan tras veras sfalsificaziuns expensas ch'els vulan buca schar endriescher lur geniturs. Ch'ina tala pratica ei fetg dubiusa e prigulusa vegn bein scadin a capir. La dretga consequenza da quella ponderaziun: Affons dueien buca stuer menar ina contabilitad. Gia il scolar primar, mo aunc dapli il scolar secundar, quel da scola media, sco era igl emprendist, dueien haver la pusseivladad da spender enqual rap per caussettas ch'els vulan tener tschelau; forsa per far in regalet ad in conscolar basignus ni per in'autra ovretta caritativa. E sch'in affon vul far inagada ina surpresa alla mumma, duei

quella buca saver leger en sia contabilitad: per in schenghetg alla muma frs. 4.95. Affons vulan il pli savens era sezs vegrir a fin cun las tuppadds ch'els commettan cun lur daners. Jeu less aunc accentuar che jeu manegi cheu adina affons normals, che creschan si en relaziuns saunas e che gaudan era en auters risguards ina educaziun pli u meins correcta.

Per giuvenils da 14 onns ensi ed emprendists che frequentan ina scola ordeifer il liug da dimora dils geniturs ei il cass empau auters. Quels survegnan savens pli grondas summas enta maun per pagar material da scola, cuost e loschament, abonnamenti d'auto postal e tren etc. Da quels astgan e duein ils geniturs pretender senz'auter reguladamein in renda quen a scret. Dasperas duein els denton haver lur daner da sac persunal a libra disposiziun senza stuer render quen persuenter. Secapescha ch'ils geniturs han adina il dretg ed era l'obligaziun da controllar las expensas da lur affons sche quei para necessari e cussegliivel ord motivs specials.

Il problem «Daners da sac per affons» vegrir savens contemplaus unilateralmeyn davart dils carschi. Ins patratga quasi adina mo vid il disar vid spargnusadad. Ins duei buc emblidar: Il daner ei buca cheu per vegrir mess a mantun, mobein per vegrir impundius prudentamein. Ils affons duein buca vegrir educai mo da tener il rap, mobein era da far il meglier diever da quel.

Ei regia tier nus savens la tema stravagada ch'ils affons daventien sfarlataders, lumpuns e metschafadigias. Sch'els creschan si en in ambient cun uorden e gaudan ina buna educaziun cumplessiva ei quella tema dil tuttafatg nunmotivada. Tier nus en Surselva dat ei pli daried ranvers e remplis che sfarlataders notorics. Quels sfarlataders ein denton segiramein buca gartegiai sin la fallida via perquei ch'els ein buca vegni intimai da spargnar, mobein perquei ch'els ein da fleivla voluntad e senza spért da responsabladad e perquei ch'els possedan memia pauc stema da sesez. Cheu ha l'educaziun sin in auter terren muncau ni disgiu. In affon educas en spért da responsabladad vegrir ad emprender dad ir entuorn cul daner, ed ils educaturs drovan haver negina tema ch'el daventi in di in sfarlatader e darsentader.